

SURAT PAULOS TE KEDUA KE JEMAT

TESALONIKA

PENULAU BECAKAP

Bedau lama' udah Paulos nules surat 1 Tesalonika, ya nrima' rita jemat de Tesalonika mayoh ngasa pemedeh aba' sida' ampal ke rita penatai Al Maseh te kedua kale' aba' takot ke penatai Al Maseh. Surat Paulos te kedua ke jemat de Tesalonika datules ngau ngudah masalah nya'. Sida' miker ente' penatai Al Maseh nyau ka' datai. Uleh Paulos madah te dapiker sida' nya' salah. Nema, sebedau Al Maseh datai age' ke dunia, ka' datai dulau siko' urang pemipen te dasebot “Ensia te Jat” aba' te ka' nentang Al Maseh.

Paulos nekan ke kebala urang te maca surat to' ente' sida' alah bamat betan percaya' ke Al Maseh amat mah idop sida' pedeh aba' sida' alah ngasa pemedeh. Paulos ngajar isa' sida' mansen kreja ngau ngidop dire', sama aba' Paulos aba' kebala kawan ya. Aba' isa' sida' tekon mulah te bayek.

Tabe' ke jemat Tesalonika

1 Tabe' ari ku Paulos, Silas, aba' Timutios ke jemat kebala urang Tesalonika te daempu Tuhan Allah Apai kita aba' Tuhan Isa Al Maseh. ²Kami bradua isa' Tuhan Allah Apai kita aba' Tuhan Isa Al Maseh nganya' pemayek ati aba' mre' idop penoh damai ke kita'.

Bradua ngucap sukor

³Kebala menyade', kami alah slareh ngucap sukor ke Tuhan Allah nema idop kita'. Nya' patot kami puluh nema kita' betamah percaya' ke Al Maseh, aba' kita' betamah ngaseh sama dire'. ⁴Nya' mah ngasoh kami gaga amat nusoi kita' ke uga' jemat Tuhan Allah te kami kunyong. Kami nusoi kita' tegoh percaya' ke Al Maseh amat urang mrisa aba' nyuroh kita' mayoh ngasa pemedeh. ⁵Kita' tegoh ngasa pemedeh nema kita' nuna' Pemrintah

Tuhan Allah. Keba' nya' Tuhan Allah ngangap kita' patot tama' ke alam Pemerintah Ya, nya' mah bukti Tuhan Allah slareh adel. ⁶Tuhan Allah te adel nya' ga' ka' malas pemedeh ke urang te ngasoh kita' pedeh. ⁷Aba' Ya ka' ngemado' pemedeh nya' ari kita' aba' ari kami senta Isa nganya' dire' turon ari sruga aba' kebala mlikat Ya te penoh kuasa. ⁸Ya datai ngau api te bejelau turon ngukom kebala urang te nadai iboh ke Tuhan Allah aba' te nadai ka' idop nuna' Brita Bayek Tuhan kita Isa Al Maseh. ⁹Kebala sida' nya' ka' jong ngasa pemedeh daukom Tuhan Allah, dabuai ari mua Tuhan Isa aba' dejaoh ari sinar kuasa Ya te lampar besai. ¹⁰Uga' nya' ka' tejadi pas ari Isa datai age' lah. Isa ka' datai age' lah isa' uga' kebala urang te daempu Ya madah pemayek Ya aba' sida' te pecaya' nya' muji nyemah Ya. Kita' adai ga' daentara sida' nema kita' pecaya' ke apa te udah kami tusoi ke kita'. ¹¹Keba' nya' kami bradua sengabot ke Tuhan Allah isa' Ya nulong kita' urang te udah dakumai Ya isa' tau' idop patot. Kami bradua isa' Tuhan Allah nguna kuasa Ya nyuroh kita' talah mulah kebala utai te bayek upa te de kedeka' kita'. Engkrema' Ya ngudah kreja te udah kita' puluh nema kita' pecaya' ke Isa. ¹²Kami bradua upa piya' isa' urang te meda' idop kita' muji Isa Tuhan kita, aba' kita' dapuji Ya nuna' pemayek ati Tuhan Allah kita aba' Tuhan Isa Al Maseh.

Kebala utai te ka' tejadi sebedau Isa datai age'

2 Kebala menyade', ento' ku ka' becakap ke kita' penatai Tuhan kita Isa Al Maseh aba' becakap ke kita dakumpol betemu aba' Ya jemah lah.* Ku minta' ke kita', ²nang sampai pemiker kita' lekas kacau aba' saban ente' kita' ninga urang madah ari penatai Tuhan Isa nyau udah datai. Nang sama skale' kita' pecaya' biar mah sida' madah pesau nya' ari Roh Kudus, ari te deajar aba' ari surat kami kedire'. ³Nang kita' ngenga' dire' datesat urang ngau brena cara! Nema sebedau ari penatai Tuhan Isa, alah tejadi dulau, mayoh kebala urang ka' meruntak ngelawan Tuhan Allah. Aba' Ensia te Jat ka' nganya' dire', ya nya' lah pesti ka' dapunas. ⁴Ensia te Jat nya' ka' ngelawan Tuhan Allah aba' ka' ninge' dire' lebeh ari kebala utai te dasembah ensia aba' te deangap sida' Allah. Aba' ya ga' ka' dudok de Rumah Kudus Tuhan Allah aba' ka' ngako' dire' Tuhan Allah.* ⁵Nadai piya' kita' ingat, ente' uga' utai nya' gah ku padah ke kita', jalai ku age'

* 2:11Tes. 4:15-17 * 2:4 Dan. 11:36; Yeh. 28:2

aba' kita'? ⁶Aba' ento' kita' tau' bada' apa te udah ngetan Ensia te Jat nya', te nyuroh ya baro' timol de senta te udah deatoh Tuhan Allah. ⁷Kuasa te jat nyau blaboh bekreja sunye'-sunye', uleh ento' age' adai te ngetan. Uleh ente' urang te ngetan nya' deame' age' ⁸pas tangan nya' mah Ensia te Jat ka' nganya' dire'. Pas Tuhan Isa datai age' alam sinar te bedawar, Ya ka' munoh Ensia te Jat nya' ngau penyuan te dakesoh ari mulot Ya aba' ka' munas Ensia nya'. ⁹Penatai Ensia te Jat nya' ari kuasa Ibles kepala' bala sitan, aba' ya ka' mulah brena macam utai te nyaroh aba' kebala tana te nipu urang. ¹⁰Ya ka' nguna brena macam utai te jat ngau nesat urang te ka' dapunas. Sida' pesti ka' dapunas nema sida' nulak aba' nadai gaga ke brita te kena' te tau' nyelamat sida'. ¹¹Aba' nya' mah te nyuroh Tuhan Allah ngenga' sida' datesat pecaya' ke utai te bula'. ¹²Keba' uga' urang te nadai pecaya' ke brita te kena' aba' gaga mulah te jat, sida' daukom.

Kita te pecaya' alah betan

¹³Kebala menyade' te dekaseh Tuhan Isa, kami alah slareh besukor ke Tuhan Allah nema idop kita', nema Ya ari semaru udah mileh kita' daslamat ngau kuasa Roh te ngudos kita' aba' nema kita' pecaya' ke pengajar te kena'. ¹⁴Tuhan Allah ka' nyelamat kita', nya' mah te ngasoh Ya ngumai kita' ngau Brita Bayek te kami padah, isa' kita' tau' dajunyong tingge' aba' Isa Al Maseh Tuhan kita. ¹⁵Keba' nya', kita' alah diri tegoh aba' kingat kah kebala pengajar te udah kita' trima' ari kami, bayek te depadah kami lansong, bayek te kami tules. ^{16–17}Kami bradua isa' Tuhan Isa Al Maseh aba' Tuhan Allah Apai kita ngibor aba' nguat ati kita', isa' kita' tau' mulah aba' madah kebala utai te bayek. Tuhan Allah slareh ngibor aba' nyuroh kita ngagam te bayek nema Ya ngaseh aba' nganya' pemayek ati Ya ke kita.

Bradua aba' bekreja

3Ento' kebala menyade' kami minta' kita' bradua ke kami isa' pesau ari Tuhan Isa deras tesebar, aba' datrima' bayek upa te udah terjadi ke kita' dulau. ²Bradua ga' isa' Tuhan Allah nyaga kami isa' kami nadai ngasa pemedeh ari kebala urang te ma jat. Nema nadai uga' urang pecaya' ke Brita Bayek nya'. ³Uleh Tuhan Isa slareh setia, keba' Ya ka' nguat ati aba' nyaga kita' ari te jat. ⁴Aba' kami yaken Tuhan Isa nulung kita', isa' apa

te udah kami padah ke kita' udah kita' puluh, aba' ka' kita' puluh ke age'.
⁵Kami bradua isa' Tuhan Isa nulong kita' isa' kita' tau' bada' ente' Tuhan Allah kaseh ke kita', aba' isa' kita' tan ngadap pemedeh upa Al Maseh.

⁶Kebala menyade', kami minta' ke kita' ngau kuasa Tuhan kita Isa Al Maseh isa' kita' ngejaoh dire' ari kebala menyade' seiman kita te ngai kreja aba' ngai nuna' pengajar te kami padah ke kita'. ⁷Kita' kedire' udah tau' bada' kita' alah nuna' cuntoh idop kami, kami nadai kala' luntos kreja jalai kami age' aba' kita'. ⁸Kami nadai kala' makai utai te nadai kami bayar, uleh betawas malam bepanteng kreja isa' kami nadai medeh kita'. ⁹Kami mulah piya' ukai tegal kami nise' hak nrima' pemre' kita', kami mulah piya' nema kami ka' ngau cuntoh ke kita'. ¹⁰Pas kami age' aba' kita', kami mre' prator upa pito', "Urang te ngai kreja, nang makai." ¹¹Kami nules uga' to' nema kami ninga' ente' adai kebala urang daentara kita' te luntos kreja, sida' bayah sibok ngaru urang. ¹²Urang te upa piya' kami kingat aba' kami ansak ngau kuasa Tuhan Isa Al Maseh isa' sida' ruos kreja ngau idop sida' kedire'. ¹³Uleh kita' nang lejo' mulah te bayek. ¹⁴Asa adai urang te nadai ka' nuna' apa te kami padah alam surat to', kelai' ke sida' aba' nang kita' bekawan aba' sida', isa' sida' malu. ¹⁵Uleh nang ngangap sida' munsoh, rara ke sida' upa meda' kita' ngerara menyade' dire'.

Pesau te pemado'

¹⁶Ento' kami bradua isa' Tuhan Isa pon damai slareh mre' damai Ya ke kita' alam uga' utai aba' slareh aba' kita' sengabot. ¹⁷*Tabé' ari ku, Paulos. Tabé' to' ku tules ngau jari ku kedire'. To' mah kelai uga' surat te datules ku. Upa pito' mah tules ku.* ¹⁸Ku bradua isa' Isa Al Maseh Tuhan kita nganya' pemayek ati Ya ke uga' kita'.